

1 कुरिन्थियन

1 पौलुस की ओर ते, जउन परमेसुर कि इच्छा ते यीसु मसीह के परेरितन होवै क बुलावा गवा अउर भइय्या सोरिथनेस के औरै ते।

²परमेसुर कि ऊ कलीसिया कि नाम जउन कुरिन्थुस मइहां यानी उके नाम जउन मसीह यीसु म पवित्तर किये गए रहै, अउर पवित्तर होय केर बुलाए गए रहै, अउर उइ सबन के नाओ जउन हर जगह (जगह—जगह) हमार अउर अपन परभु यीसु मसीह क नाम में पराथना करेत हइ।

³हमरे बाप परमेसुर अउर परभु यीसु मसीह कि ओर ते तुहि अनुग्रह अउर सानती मिलत रहइ।

धन्यबादु

⁴हम तुमरे बारे म अपन परमेसुर क धन्यबादु सदा करित हइ, यहिते कि परमेसुर क ई अनुग्रहौ तुइ पै मसीह यीसु म भवा। ⁵उइ मा हुइ कै तुइ हर बातन यानी सबहिन बचनन अउर सबहिन ग्यानन म धनी कीन गएउ। ⁶कि मसीह कि गवाही तुइ मा पक्की निकरी। ⁷हियां तलक कि कउनउ बरदानउ म तुइका घाटा नाहीं, अउर तुइ हमार परभु यीसु मसीह क परगट होइ क बाट जोहत रहत हौ। ⁸ऊ तुहै अनन्त तलक मजबूत करी कि तू हमार परभु यीसु मसीह क दिन म निरदोस ठहरौ। ⁹परमेसुर सच्चा हइ, विसवासु करै वाल हइ, जेहि तुइ अपन बेटवा हमार परभु यीसु मसीह की संगति म बुलाइस हइ।

कलीसियन मा फूट—दलबन्द

¹⁰हे भइयों हम तुहितो यीसु मसीह जउनु हमार परभु हइ ऊ के नाम ते बिनती करति हउ, कि तुइ सबइ एकइ बातु कहौ। तुइ मा दलबन्दी मुला एकहि मन अउर एकहि मत होइके मिले रहौ (एक रहौ) ¹¹काहे ते हे हमार भइयों, खलोए के परिवार के लोगन ते हमका तुम्हार, बारे म बताइन हइ कि तुइ मां झगड़उ होत रहत हय। ¹²हमार ई कहव है, कि

तुइ मा ते कोउ अपन आप क पौलुस क, कोउ अपुल्लोसक कोउ कैफाउ, कोउ मसीह क कहत है।

¹³का मसीह बटि गवा? का पौलुस तोहार खातिर सलीब प चढ़ावा गवा? का तुहै पौलुस के नाम पै बपतिसमा पायेउ? ¹⁴हम परमेसुर क धन्यबादु करत हउ कि क्रिस्युस अउर गयुस क छोड़ि, हम तुम मां ते कउनउ क बपतिसमा नाहीं दियेन। ¹⁵कहूं ऐस न होय कि कउनउ कहइ, कि तुइ हमार नाम पै बपतिसमा पाएउ। ¹⁶हम स्तिफनास क घरानौ क बपतिसमा दिहेन। इनहिन क छोड़ि, हम नाहीं जानत कि हम अउर कउनउ क बपतिसमा दिहेन। ¹⁷काहे ते मसीह मोहिका बपतिसमा देइ क नाहीं, बल्कि सुसमाचार सुनावै क भेजिन हइ, अउर यहाँ सबदन कै ग्यान क मुताबिक नाहिन ऐस न होय क मसीह केर सलीब बेकार जाय।

मसीह परमेसुर केर गियानु अउर सामरथ है

¹⁸काहे ते सलीब की कथा नास होइ वालेन क निकट मूरखता हइ।

¹⁹मुला लिखा हय कि हम गियान वालेन क गियान नासु करिहउं, अउर समझदारन क समझ क तुच्छ करिहइं।

²⁰कहां हइ गियानवान? कहां हइ सासतरी? कहां ई संसार क विवाद करै वाले? का परमेसुर सांसारिक गियान क मूरखता नाहीं ठहराइस? ²¹काहे ते जबही परमेसुर क गियानु के मुताबिक संसार गियानु ते परमेसुर क न जानिस, तउन इव परमेसुर क नीक लाग कि परचार की मूरखता ते विसवासु करइ वालेन क मुकती देई। ²²यहूदी तौ चीन्ह चाहत हय अउर यूनानी गियानु क खोज मां हइ। ²³मगर हम तौ उइ सलीब पै चढ़ाए गये मसीह क परचार करति हइ, जउन यहूदिन क पास ठोकर क कारन अउर दूसर धरम मानइ वालेन क नेरे मूरखता हइ। ²⁴मुला जउन बुलाए गए हयं, का यहूदी का यूनानी उन्हेके

पास मसीह परमेसुर कि सामरथ अउर परमेसुर क गियानु हइ।²⁵ काहे ते परमेसुर कि मूरखता मनइन क गियानु ते गियानु वाले हई। अउर परमेसुर कि निरबलता मनइन क बल ते बहुते बलवानु हइ।

²⁶ हे भाइयौ, अपन बुलाए जान क तौ सोचौ, कि न देह कै, मुताबिक बहुत गियानुवान, अउर न बहुत सामरथवान, अउर न बहुत अच्छे कुल बुलाए गये रहैं।²⁷ मुला परमेसुर जगत कै मूरखन क चुनि लिहिस हय कि गियानु वालन क सरमिन्दा करै, अउर परमेसुर जगत के कमजोरन क चुनि लिहिस हइ, कि ताकत वालन लजाय देय।²⁸ अउर परमेसुर जगत के नीचन अउर तुच्छन क, बल्कि जउन हइउं नाहिन उनहुन क चुनिन, काहे ते उइ जउन हइ बेकार ठहरावै।²⁹ जेहिते कउनउ परानी परमेसुर के समुहे सेखी न करै पावै।³⁰ मुला उहि ओर ते तुम, मसीह यीसु हइ, जउन परमेसुर के ओर ते हमार तइ गियानु ठहरौ, यानी धरम अउर पवित्रता अउर छुटकारउ।³¹ जेहिते जइस लिखउ हइ, वैसइ होय कि “जउन सेखी करे तो उइ परभु म घमंड करै”।

2 हे भाइयौ, जबइ हम परमेसुर क भेटु सुनइ तइ भये तुहार पास आवा, तौ बचनु या गियानु कि अच्छाई के साथु नाइ आवा।² हम इवु ठानि लीन रहै कि तोहार बीच यीसु मसीह, बल्कि सलीब पै चढ़ाए गए मसीह क छाड़ि अउर कउनो बात क न जानउ।³ हम निरबलता अउर भय ते, अउर बहुत कांपत भये तोहार साथे रहेउ।⁴ हमारु बचनु अउर परचारु म गियानु कि लुभावै वाली बातें नाई रहैं, मगर आतमा क अउर सामरथ क परमान रहै।⁵ यहिते कि तोहार विसवासु मनइन क गियानु पै नाई बल्कि परमेसुर क सामरथ प निरभरु होय।

परमेसुर केर गियानु

⁶ विसवासु में पक्के लोगन म हम गियानु सुनाइत हई, मगर इ संसार क अउर ई संसार के नास होय वाले हाकिमन (अधिकारिन) क गियानु नाहीं हय।⁷ मुला हम परमेसुर क ऊ भेदभरा गियानु, भेदइ की रीति पै बताइत है, जेहिका परमेसुर सनातन ते हमार महिमा कि खातिर ठहराइन रहै।⁸ जेहिका ई संसार के हाकिमन ते (अधिकारिन म ते) कौनउ नाहीं जानिस, काहे ते अगर जानति तउ महा महिम परभु क सलीब प न चढ़उते।⁹ मुला जइस लिखइ हय, कि जउन आंखि ते नाहीं देखिसि अउर कानु ते नाहीं सुनिसि अउर जउन बातें मनइन के चित्त मां नाई चढ़ी तउनइ

हई।

¹⁰ जउन परमेसुर उइका अपन आतमा ते हमन पै परगट किहिन रहै, काहे ते आतमा सबन बातन क, बल्कि परमेसुर की गहन कौ जांचति हइ।¹¹ मनइन म कउन केहि मनइ की बातन केर जानति हइ, खाली मनई की आतमा जउन उहिमा हइ? वैसेइ, परमेसुर केर बातन केहि नाहीं जानत केवल परमेसुर केर आतमा।¹² मुला हम मां संसार की आतमा नाहिन, मगर ऊ आतमा पायेन हई, जउन परमेसुर की ओर ते हइ, कि हम उन बातन क जानी जउन परमेसुर हमका दिहिस हइ।¹³ जिनहिन क हम मनइन क गियानु क सिखाई भई बातन मां नाहीं, मगर आतमा की सिखाई भई बातन मां आतमा की बातन क आतमा की बातन ते मिलाइ के सुनाइत।¹⁴ मुला परान रक्खे वाला मनई परमेसुर कि आतमा की बातन का उदाहरन नाई करत, काहे ते, उइ ऊकी दिरस्टी मां मूरखता की बातें हई। अउर न ऊ उनहुन क जनि सकत हइ, काहे ते उनकी जांच आतमा क रीति ते होति हइ।¹⁵ आतमा क मनई सबै कछु जांचत हइ, मुला ऊ खुदउ काहू ते नाई जांचा जात हइ।¹⁶ काहे ते परभु क मन केहि जानि स हइ, जउन वहिका सिखावइ? मुला हम मां मसीह क मनु हइ।

कलिसियान केर विभाजन

3 भाइयौ, हम तुइते ई रीति ते बातन क न करि सका, जइसइ आतमिक केर लोगन ते, मुला जइस सरीर वाले लोगन ते अउर उइते जउन मसीह म छोट लरिका हइ।² हम तुहै दूधु पिलाएन अन्न माहि खिलाएन, काहे ते तुइ उहिका नाहीं पचाए सकति रहौ, बल्कि अबहू तलक नाही पचाए सकत हउ।³ काहे ते अबहू तलक सरीर रक्खे वाले हउ, यहि ते कि जबइ तलक तुइ मां डाहु हइ अउर झगड़उ हइ, तब तलक का तुइ सरीर वाला नाहीं? अइस मनई की रीति पै नाहीं चलत? यहिते कि।⁴ जबै एकु कहति हय, हम। पौलुस केर हउं, अउर दूसर कि हमं अपुल्लोस केर हउं तब तलक का तुइ मनई नाहीं?

⁵ अपुल्लोस कहइ, पौलुस क हइ? खाली सेवकु हइ, जेहिते तुइ विसवासु कियउ, जइस हर एकै क परभु दिहिसि।⁶ हम लगाएन, अपुल्लोस सींचिन मुला परमेसुर बढाइन।⁷ यहिते न तौ लगाव वाल कछु हइ अउर न सींचइ वाले मुला परमेसुर जउन बढावै वाल हइ।⁸ लगावइ वाले अउर सींचइ वाल दोऊ एक हइ। मुला हर एकु जन अपनेइ परिसरम क मुताबिक

आपनि मजदूरी पइहइ।⁹काहे ते हम परमेसुर केर सहकरमी हन, तुइ परमेसुर केर खेती अउर परमेसुर केर खेत हउ।

¹⁰परमेसुर केर उइ अनुग्रह केर मुताबिक जउन मोहि दियउ गयउ हइ, हमने बुधिमान राज मिसतरी कि नाई बुनियाद डारेन अउर दूसर उइ पर रद्दा राखति हइ, मगर हर एकु जने चौकस रहइ कि ऊ वहि पे कइस रद्दा रक्खति हइ।¹¹काहे ते उइ नीव क छाड़ि जउन पड़ी हइ अउर ऊ यीसु मसीह है, कोई दूसरि नीव नाहीं डारि सकत हइ।¹²यदि कउनउ ई आखि प सोनउ या चाँदिय या बहुमूल पत्थर या काठु या खर पतवार रद्दउ रक्खइ।¹³तउ हर एकु कइ कामु परगट होइ जाई, काहे ते बहु दिन वहिका बताई, यहिते कि आगि के साथे परगट होई अउर ऊ आगि हर एकु क कामु परखि हई कि कइस हइ।¹⁴जेहिका कामु ऊ पै बनइ भवो स्थिर रही, वहु मजदूरी पाई।¹⁵अउर अगर कोहू क कामु जलि जाई, तउ ऊ हानि उठाई, मुला ऊ खुदौ बचि जाई, मुला जरत जरत।

¹⁶का तुम जानित हउ, कि तुइ परमेसुर क मन्दिर हइ। अउर परमेसुर क आतमा तुम मा रहत।¹⁷मुला कउनउ परमेसुर क मन्दिर क नास करी तउ परमेसुर वहिका नास करी, काहे ते परमेसुर क मंदिर पवित्र हइ। अउर ऊ तुम बाटो।

¹⁸कउनउ अपुन क ध्वाखा न देव। अगर तुम मा ते कउनउ ई संसारु म अपन आपु क गियानी समझि हइ तउ मूरखि बनि हइ कि गियानी हइ जाइ।¹⁹काहे ते ई संसारु क गियानु परमेसुर क निकट मूरखता हइ, जइस लिखउ हइ, कि ऊ गियानिन क उइकी चतुराई मां फांसि देति हइ।²⁰फिर परभु गियानिन कि चिन्तन क (सोचन क) जानति हइ कि बेकार हइ।²¹यहिते मनइन प कउनउ घमन्ड न करै, काहे ते सबही कछु तोहर हइ।²²का पौलुस, का अपुल्लौस, का कैफा, का जगतु, का जीवनु, का मरनु, का बरतमानु, का भविस्स, सबही कछु तुम्हार हइ।²³अउर तुइ मसीह क हइ, अउर मसीह परमेसुर क हइ।

यीसु केर चेलन

4मनइ हमहुक मसीह क सेवकु अउर परमेसुर क भेदन क भन्डारी समझइ।²हियाँ भन्डारिन मा ई बात देखी जात हइ, कि विसवासी निकलै।³मुला हमरी नजर मा ई बहुतै छोटि बाति हइ, कि तुइ मां मनइन क कोऊ नियाव करै वाल मोहिका परखै, वरन मंड, अपन क, नाहीं परख।⁴काहे ते हमार मन

मोहिते कउनउ बात मं दोसी नाई ठहरावत, मुला ई ते हम निरदोस नाई ठहरत, काहे ते हमार परखन हार, परभु हइ।⁵सो जब तलक परभु न आवै, समय ते पहिलेइ कउनउ बात क नियाव न करौ। वहीँ अन्धियारु कि छिपी भई बातें जोयति म (परकास मं) दिखाई, अउर मनउ की भेदन क परगट करी, तबै परमेसुर कि ओर ते हर एकु की परसंसा होई।

⁶हे भाइयो, हम इन बातन मं तोहार खातिर अपन अउर अपुल्लौस कि चरचा दिरिस्तान्तन (उदाहरनन) की रीति पे कीन हइ। यहिते कि तुइ हमरेइ दुआरा ई सीखौ, कि लिखे हुए ते आगेइ न बढ़ौ, अउर एकु के पच्छ म अउर दूसर क विरोधु मं गरब न करेउ।⁷तुम मां अइसन का है कि तुमका लोग महान समझति हन? अउर तुम्हरे पास का है जउन तुमका मिला न हो? अउर अगर अगर तुमका मिला हय तौ तुम काहे घमंड करत हौ।

⁸मानौ तुमका दुसरे ते नाहीं मिला तुम तौ तिरपित होइ चुके हौ अउर तुम धन्य होइ चुके हौ।⁹हमरी समझ मां परमेसुर हम परेरितन केर सबहिन केर बाद उइ लोगन कि नाई ठहरावा हइ, जेहि की मिरतू की आगया होइ चुकी हइ। काहे ते हम जगत अउर सरग दूतन क अउर मनइन के खातिर एकु तमासउ ठहरेइ हइ।¹⁰हम मसीह के खातिर मूरख हई, मुला तुइ मसीह म बुधिमान हउ। हम निरबल हन, मुला तुइ बलवानु हइ। तुइ आदर पावति हइ, मुला हमार निरादर होत हइ।¹¹हम इ घड़ी तक भूखे—प्यासे अउर नंगे हई अउर घूसौ खाइत हई, अउर मारे—मारे फिरत हइ, अउर अपन हाथन ते काम करि कै परिसरम करित हइ।¹²लोगन बुरा कहति हई, हम आसीस देइत हई। उइ सतावत हई, हम सहित हई।¹³वइ बदनामु करत हई, हम विनती करति हई हम आजु तलक जगत क बहारन अउर सबै सामानन कि खुरचुन की नाई ठहरे हन।

¹⁴हम तोहिका लज्जित करै क बातन क नाई लिखित मुला अपन दुलारा पूत जानिकै तुइ का चिताइत हइ।¹⁵काहे ते अगर मसीह म तोहार सिखावै वाले दस हजारै होत, तबौ तोहर बाप बहुत नाहिन, चहिते कि मसीह यीसु म सुसमाचारु कि खातिर हम तोहार बाप भयउ।¹⁶सो हम तोहिते विनती करति हउ कि हमरी जइस चाल चलौ।¹⁷यहिते हम तिमथियुस क जउन परभु म मोर पियार अउर विसवासु योग बेटवा हइ, तोहरे पास भेजेन हइ अउर वहु तुइका मसीह म हमार चरित समरथ (याद) करइहै। जइस कि हम हर जगह पे हर एकु मंडली उपदेसु

करति हइ।

¹⁸कितनइ तौ अइस फूलि गये हइ, मानौ हम तौहार पास आवैक नाहीं। ¹⁹मुला परभु चाहई तउ हम तोहारे पास सीधै आइहौं, अउर उइ फूले हुअन कि बातन क नाहीं, मुला उइ की सामरथउ क जानि ले हौं। ²⁰यहिते परमेसुर क राज बातन मां नाहीं, मुला सामरथ म हइ। ²¹तुइ का चाहत हइ? का हम छडी लेइ तोहारे पास आई या परेम अउर नमरता कि भावना साथइ?

दुराचार केर भयंकर उदाहरन जऊन ना होय के चाही

5हियां तक सुनै म आवत हइ तुइमा विभचारु होत हइ। बल्कि अइस विभचारु जउन दुसरे धरम म मानइ वाले नौ म नाई होत, कि एकु मनई अपन बाप कि पतनिउ केर राखत है। ²अउर तुम सोक तौ नाई करत जेहिते ऐस काम करइ वाले तोहारे बीचु मे ते निकरि जाति, मुला घमन्डु करत हउ। ³हम तो सररीर क भाव ते दूरि रहउ मुला आतमक भाव ते तोहारे साथ होइकै मानउ उपस्थिति की दसा म ऐस काम करइ वालेन बारे म ई आगिया दै चुकै हन। ⁴कि जबै तम अउर हमार आतमा हमरे परभु यीसु की सामरथ केर साथै यकट्टे होय। तौ ऐस मनई हमार परभु यीसु क नाम ते। ⁵सररीर क विनास के खातिर सैतान क सौंपइ जाय, जेहिते ऊ की आतमा परभु यीसु क दिनम उद्धार पावै।

⁶तौहार घमन्डु करव नीक नाहीं। का तुइ नाई जानत कि थोड़इ सा खमीर पूरे गूथे गये आटा क खमीर करि देत हइ। ⁷पुरान खमीर निकरि कइ अपन आप क सुद्ध करौ कि नया गूथा भवा आटा बन जाउ। जेहिते तुइ अखमीरी होउ, काहे ते हमारौ फसह जउन मसीह हइ। बलिदान भयो हइ। ⁸सो आपु, हम उतसव म, आनन्द मनावइ, नाहीं तौ पुराने खमीर ते अउर न बुराई अउर दुस्टता के खमीर ते, मुला सिध्ताई अउर सचाई की असीमीरी रोटी ते।

⁹हम अपन पतरी म तुइका लिखेन, कि विभचारिन कि संगति न करेउ। ¹⁰ई नाई कि तुइ बिलकुल ई जगत क विभचारिन या लोभिन या अनधेरु करै वालेन या मूर्ति पूजन की संगति न करौ, काहे ते ई दसा म तौ तुहै जगत म ते निकरि जाइक पड़ति। ¹¹हमार कहबु यहु हइ कि अगर कउनउ भाई कहिलाइ कै विभचारी लोभी, या मूर्ति पूजइ वाल होइ तौ उइकी संगति न करेउ, वरन ऐस मनइ क साथै खानौ क खायेउ।

¹²काहे ते मोहिका बाहर वालेन क नियाउ करै ते कउनु कामु। का तुइ भीतर वालेन क नियाव नाहीं करत। ¹³मुला बाहर वालेन क नियाउ परमेसुर करत हइ। यहिते उइ कुकरम करै वालेक अपन बीचु म ते निकारि देउ।

मसीही मइहन मुकदमा बाजी

6का तुइ मा ते कोइ क ई हियावु हइ कि जब दुसरे क साथ, झगड़ा होय, तौ फँसला के खातिर अधरमिन के समीप जावै, अउर पवित्तर लोगन के नगीचे न जावै? ²का तुइ नाइ जानति कि पवित्तर लोग जगत क नियाव करहिई? सो जबै तुहै जगत क नियावु करै क हइ तौ का तुइ छोट ते छोट झगड़नै क निरनय करै के योग नाई? ³का तुइ नाई जानत, कि हम सरग के दूतन क नियाव करि हँ? ⁴तउ का संसार कि बातन क फँसला करइक होय तौ का उनहिन क बैठे हौ जउन कलीसिया म कछु नाई समझे जात हइ। ⁵हम तोहका लज्जित करै क ई कहति हौ का सचमुच इ तुइ मा एकौ बुधिमान नाई मिलत, जउन अपन भइयन क फँसला करि सकै। ⁶बल्कि भाई—भाई म मुकदमा होत हइ। अउर वहाँ अविस्वासुन क समुहे।

⁷मुला सचमुचइ तुम मा बड़उ दोसु तौ ई हइ कि आपस म मुकदमा करत हउ। तुइ अनयाय काहे नाई सहति? अपन हानि क काहे नाई सहति? ⁸वरन् अनयाउ करत अउर हानिउ पहुंचावति हउ अउर वहाँ भाइन क।

⁹का तुइ नाई जानति कि अनियायी लोग परमेसुर क राज के वारिस न हइ हँ? धोखा न खाउ, न वेस्यागामी, न मूरति पूजइ वाले, न दरस्तरी गामी, न लुच्चे, न मनई गामी। ¹⁰न चोर, न लोभी, न दारुबाज न गारी देइवाले, न अनधेरु करइ वाले परमेसुर क राज के वारिस हइहँ। ¹¹अउर तुइ मां ते कितनेइ ऐसेइ हँ, मुला तुइ परभु यीसु मसीह क नाम ते अउर हमार परमेसुर क आतमा ते धोए गए अउर पवित्तर भये अउर धरमी ठहरें।

अपवित्तरता सइहन दूर भागेव

¹²सबै वसतुवै मोइ खातिर उचितउ हइ, मुला सबै सामानन हमरे खातिर उचितइ हइ। मुला हम कोई बात क आधीन न होइब। ¹³भोजनु पेट की खातिर अउर पेटु भोजन कइ खातिर हइ। ¹⁴मुला परमेसुर अपन सामरथ ते परभु क जिलाइस अउर हमहुक जिलइहँ। ¹⁵का तुइ नाई जानत हउ कि तुमार देहउ

मसीह अंग हइ? तउ का हम मसीह का अंगु लै कइ उनहुक वैस्या क अंगु बनाई? कदापि नाई।¹⁶का तुइ नाई जानति हउ कि जउन कोई वैस्या ते संगति करइ हइ, ऊ उहिके साथे एकु तनु होइ जाति हइ, काहे ते ऊ कहति हइ कि उन दोनौ एकु तनु हई।¹⁷अउर जउन परभु कि संगति म रहत हइ, बहु ऊ के साथै एकु आतमा होइ जात हइ।

¹⁸वेभिचारु ते बचेइ रहेउ। जितनेउ दूसर पाप मनई करत हइ तेइ देह के बाहर हइ। अगर वेभिचारु करइ वाल अपनइ देह के खिलाफ पापु करति हइ।¹⁹का तुइ नाई जानत हइ कि तोहार देह पवित्तर आतमा क मंदिर हइ जउन तुइ मा बसति हइ अउर तुहै परमेसुर कि ओर ते मिला हइ? तुइ अपन नाई हइ।²⁰काहे ते दाम देइ के मोलु लिए गए रहउ। यहिते अपनी देहि परमेसुर क महिमा करउ।

बियाहु

7उइ बातन के बारे मां जउन तुइ लिखिस, यहु नीक हइ, कि पुरुस इह तना न छुवै।²मुला वेभुचारु क डरते हर एकु मनई केर मेहरारु अउर हर एक इस तना पति होइ।³पति आपन मेहरारु क हकु पूर करै अउर वैसेइ मेहरारु अपन पति का।⁴पतनिक अपन दयाह पै अधिकारु नाई मगर उहिके पति केर अधिकारु हइ, वैसेइ पति का अपन देह प अधिकारु नाई मुला मेहरारु हइ।⁵तुइ एक दूसर ते अलग रहउ, मुला केवल कछुक समय तलक आपस कि सहमति ते कि पराथना केर खातिर अवकासु मिलइ, अउर फिर ए साथै रहउ। ऐस न होइ कि तोहरे असंयमु के कारन सइतान तुहै परखै।⁶मुला हम जउन कहत हउं कि ऊ अनुमति हइ न कि आग्या।⁷हम ई चाहति हउं कि जइस हम हउं वइसइ सबै मनई होय, मुला हर एकु क परमेसुर कि ओर ते विसेस बरदानु मिलेइ हई। कोइक कैसेउ परकार क, अउर कोउक कोउ दूसरि परकार के।

⁸मुला हम अविवाहितन अउर विधवावन क बारे म कहति हउं कि उइ खातिर ऐसइ रहउ नीक हइ, जइस हम हउ।⁹मुला अगर उहि संयम नाहीं कर सकइ तउ बियाहु करै काहे ते बियाहु करना कामातुर रहै ते भला होई।

¹⁰जिनके बियाहु हुइ गवा है उनहू क हम नाहीं बरन परभु आग्या देत हइ कि मेहरारु आपन पति ते अलग ना हुइहै।¹¹अउर अगर अलगै होइ जाय, तउ बिन दूसरि बियाहु कियै रहै, या अपन पति ते फिर मेलि करि लेई। अउर न पति अपन पतनिक छाड़ें।

¹²दुसरेन ते परभु नाई मुला हम कहति हउं, अगर कउनउ माइक मेहरारु विसवासु न करति होय, अउर उहिके साथ रहबै परसन्न होय तउ ऊ वहिका न छाड़ै।¹³जउन इस तरक पति विसवासु न करति होय अउर उहिक साथै रहबै ते परसन्न होई, ऊ पति क न छाड़ै।¹⁴काहे ते अइस पति जउन विसवासु न रखति होइ, बहु पतनिक कारन पवित्तर ठहरत हइ अउर अइसइ परानी जउन विसवासु नाई रखति, पति के कारन पवित्तर ठहरति हइ, नाहीं तो तुम्हार लरिका वाले कलकनी होतै, मुला अब तौ पवित्तरु है।

¹⁵मुला जउन मनई विसवासु नाई रखति, अगर ऊ अलग होय तौ अलगु होन देउ। अइसी दसा मां कोनउ भाई या बहिन बन्धन मां नाई, मुला, परमेसुर तौ हमहुक मेलि मिलापु कै खातिर बुलाइन हई।¹⁶काहे ते हे स्त्री, तू का जानति हइ कि तुइ अपन पति क उद्धार कराइ लेई? औरतियो अउर हे मनई तुइ का जानति इ कि तुइ अपन पतनी केर उद्धार कराइ लेई।

¹⁷मुला जइस परभु हर एकु क बांटनि हई अउर जइस परमेसुर हर एक क बुलाइन हई। वैसइ ऊ चलै अउर सबइ कलीसियन म ऐसइ ठहरति हउ।¹⁸जउन खतना किया भवा बुलायउ गवा हइ, ऊ बिन खतना क न बनाई, जउन बिना खतना कि बुलायउ गवा हय, बहु खतना क न करावइ।¹⁹न खतना कछु हइ, अउर न बिन खतना क, मुला परमेसुर की आग्यन क मानबै सबै कछु हइ।²⁰हर एकु जनु जउनउ दसा म बुलावा गवा होई वहिमा रहै।²¹अगर तुइ दास की दसा मां बुलावा गवा होय तउ सोंचु न कर, मुला अगर तुइ सुतलर हुइ सकै तउ ऐसन कामु करउ।²²काहे ते जउन दास की दसा म परभु म बुलावा गवा हइ, ऊ परभु क सुतंतर कीन हइ। अउर वैसेइ जउन सुतंतर कि दसा म बुलावा गवा हइ, ऊ मसीह क दासु हइ।²³तुइ दाम दै के मोलु लिए गए हौ, मनइन के दासु न बनौ।²⁴हे भइयो, जउन कउनउ जैसि दसा म बुलावा गवा होइ, ऊ वही दसा म परमेसुर क साथै रहै।

²⁵कुवारिन क बारे मां परभु कि कउनउ आग्या मोहि नाई मिली मुला विसवासु होइ कि खातिर जइस दया परभु मोहि पै किहिन हई, वहिके माफिक राय देत हइ।²⁶हमरी समझ मं यहै नीक हइ कि आज कल कलेस के कारन मनई जइस हइ वइसइ रहै।²⁷अगर तोहार मेहरारु हइ, तौ वहिते अलग होय के जतन न करौ, अउर अगर तोहार मेहरारु नाई तौ मेहरारु क खोजु न करउ, मुला।

28अगर तुझे वियाही करौ, तौ पापु नाई अउर अगर कुंवारी वियाही जाइ तउ कउनउ पापु नाई मुला ऐसेन क सरीर क दुखु होई अउर हम बचावा चाहित हइ।

29हे भाइ लोगन हम ई कहित हउं कि समय कम कीन गा है यहि ते चाहिये, जउनक मेहरारु होय उइ ऐसे होय मानउ उइके मेहरारु नाई। 30अउर रोवइ वाले ऐसे होय, मानउ रोवत नाई। अउर आनन्द करइ वाले अइस होय। मानउ आनन्द नाई करत हइ। अउर मोल लेई वाले अइस होय कानउ उइके पासइ कछु हैय नाई। 31अउर ई संसार क वरतइ वाले अइस होय कि सांसारिक न हुइ जायं, काहे ते ई संसारु की रीति अउर विवहार बदलत जात हइ।

32सो हम ई चाहित हउं कि तुम्हें सोचु न होय, चिन्ता न होय, बिन वियाहा मनई परभु की बातन कि चिन्ता न (सोच म) रहत हइ कि परभु क कइसे परसन्न राखई। 33मुला विवाहिता मनई संसार कि बात कि चिन्ता न रहति हइ, कि अपन मेहरारु की रीति ते परसन्न रक्खई। 34वियाह अउर अनवियाहउ म भेदु हइ। बिन वियाही परभु की चिन्ता म रहति हइ कि ऊ देह अउर आतमा दोउन म पवित्तर होई, मुला वियाही संसार कि चिन्ता रहति हइ, कि अपन पतिक परसन्न राखें। 35ई बात तो हरइ लाभु की खातिर कहति हउं, न कि तुहिका फसावै क खातिर, बल्कि एहि खातिर कि जइस सोहति हइ, वैसइ कियउ जाय, कि तुम एकु चित्त होइके परभु की सेवा में लगेन रहौ।

36अउर अगर कउनउ यहु समझै कि हम ऊ कुआरि क हकु मारि रहेन हइ, जेहिकी जवानी ढलइ हइ, अउर परयोजनौ होय तो जइस चाहै वैस करै। ई मा पापु नाई ऊ वहिका वियाहु होइ हय। मुला 37जउन मन म दिरढ़ रहति है अउर वहिका परयोजन न होय बल्कि अपन इच्छा क पूरी करै म अधिकार रक्खति होय अउर अपन मन म यह बात ठान लीन हइ कि हम अपन लइकी के बिन वियाही रक्खिहउं, ऊ अच्छा करति हय। 38सो जउन अपन कुआरि क वियाहु करि देत हइ, ऊ अच्छा करति हइ, अउर जउन वियाहु नाहीं करि देत ऊ अउरउ अच्छा करति हई।

39जबै तलक कउनउ स्त्रिक पति जीवित रहत हइ तब तलक ऊ उहि ते बांधी भई हइ, मुला जबै उहिका पति मरि जाइ तौ जेहिते चाहै वियाहु करि सकति हइ मुला केवल परभु मा। 40मुला जइस हइ अगर वइसइ रहै तौ हमार विचार म अउरउ धन्य हइ। अउर हम समझति हइ कि परमेसुर कि आतमा मोहु

म हय।

मूरतिन केर चढ़ावा गवा परसाद

8अब मूरतिन क समुहे बलि की हम वस्तुनि के बारे म हम जानित हइ, कि हम सबन क ग्यानु हइ। ग्यानु घमंडु उपजावति हइ, मुला परेम ते उन्नति हइ। 2अगर कउनउ समुझई कि हम कछु जानति हउ, तउ जइस जानइ केर चाही वैसे अब तलक नाइ जानति। 3अगर कउनउ परमेसुर ते परेम राखति हइ, तौ उहिका परमेसुर पहिचानति हइ।

4मूरतिन क आगे वाले की हम वस्तुनि क खाइ के बारे म हम जानित हइ कि मूरति जगत म कउनउ सामान नाई अउर एकु क छोड़ि अउर कउनउ परमेसुर नाई। 5अगर आकास म अउर धरती पै बहुते ईसवर कहात हइ। (जैस कि बहुते ईसवर अउर बहुते परभु हइ) 6उहि पर भी हमार निकट तौ एकै परमेसुर हइ यानी बापु, जेहि की ओर ते बसतु हइ हम वहिके खातिर हन, अउर एकै परभु हइ, यानी यीसु मसीह जेहिते सबै वस्तुवै हम अउर हमहूँ उहिते हन।

7सबन क यहु गियानु नाई हइ मुला कितनेइ तउ अबहिन तलक मूरत क कछु समझइ म खातिर मूरतिन के आगे बल्कि हम केर कछु सामान समझि कइ खाति हइ। 8भोजनु हमका परमेसुर क निकट नाई पहुंचावत। अगर हम न खाई तौ हमार कउनउ हानि नाई अउर अगर खाई तौ कछु नफा नाई।

9चौकस रहउ, ऐस न होय कि तोहार ई सुतंतरता कहुं निरबलन के खातिर ठोकरु क कारनु होइ जाइ। 10अगर कउनउ तोहि बुद्धिमान मूरति के मंदिर म भोजनु कर देखइ अउर ऊ निरबल जन होय तौ का उहिके विवेक म मूरति के समुहे बलि की हम सामान क खाइ के हिसाबु न हुइ जाई। 11ई रीति ते तोहरे गियान के कारनन ऊ निबल भाई या नास होइ जाई। जेहिके खातिर मसीह मरि गवा। 12भाइन क अपराधु करै ते अउर उइके निरबल मनु क चोट देइ ते तुइ मसीह क अपराधु करत हउ। 13ई कारनु अगर भोजनु हमार भाई क ठोकरु खवावै तौ हम कबहूँ कउनउ रीति ते मासु न खइहौं। ऐस न होइ कि हम अपन भाई क ठोकरु क कारन बनउ।

पौलस अपन अधिकारन सइहन कउनओ लाभ नाहि उठाईन

9का हम सुतंतर नाई? का हम परेरित नाई? का हम यीसु क जउनु हमार परभु हइ नाई देखेन? का तुम परभु हमार बनाए नाई? 2अगर हम अउरन

के खातिर परेरित नाई, तउ तुम्हार खातिर तौ हउं, काहे ते तुइ परभु म हमारि परेरिताइ प छापु हउ।

³जउन मोहिका परखति हइ उइके खातिर यहै हमार जवाबु हइ। ⁴का हमहुक खाइ पियइक अधिकार नाई? ⁵का हमार यहु अधिकार नाई कि कउनउ मसीही बहिन क वियाहि करैक खातिर फिरी, जैस अउरौ परेरित अउर परभु की भाई अउर कैफा करति हइ। ⁶या केवल मोहिका अउर वरनवास क अधिकार नाई कि कमाई करब छाँडै।

⁷कउनउ कबहूँ अपनेइ पाकिट, खाइ कै सिपाहिन कामु करति हइ? कवनु दाखु की बारी लगाइ के उहिका फलु नाई खाति? कउन भेइन की रखवाली कइके उइक दूधू नाई पियत? ⁸का हम ई बातन क मनइन की रीति पै बोलति हउं? ⁹का बेवस्था याही नाई कहति? काहे ते मूसा की बेवस्था म लिखइ हइ कि दंबरी म चलति भए बैल क मुंह न बाँधेउ। का परमेसुर वैलन क चिनता करति हय? या विसेस कइ के हमरे खातिर कहति हइ? ¹⁰हां हमरेइ खातिर लिखइ गवा, काहे ते उचित हइ कि जोतइ वाल आसा ते जोतै अउर दावन करै वाले भागी होय कि आसा ते दंबरी करै। ¹¹सो जबइ हम तोहर खातिर आतमा कि सामानन क बोइब तउ का ई कउनउ बड़ी बात हइ, कि तोहार दयांह की बस्तुनि क फसल काटी। ¹²अउरन क तोहि पै अधिकार हइ, तउ क हमार यहिते अधिकु न होइ? मुला हम यहु अधिकार काम मा नाई लायेन। हम सबै कछु सहति हइ कि हमते मसीह क सुसमाचार क कछु रोकु न होय। ¹³का तुम नाहीं जानत कि जउन पवित्र बस्तुन की सेवा करत हइ उइ मंदिर मा ते खात हइ अउर जवनु बेदी सेवा करति हइ, उइ बेदी साथ के भागी होत हइ? ¹⁴यहि रीति ते परभुवों ठहराइन कि जउन लोग सुसमाचार सुनवति हइ। उनहुन की रोजी रोटी सुसमाचार ते हइ।

¹⁵मुला हम इनहुन मा ते कउनउ बात काम म न लाइसि अउर हम तउ ई बातन क एहिते नाई लिखेन कि हमरे खातिर ऐस क्रिया जाय, काहे ते तउ हमार मरि जावे भलउ हइ, कि कउनउ हमार घमन्डु बेकार ठहरावइ। ¹⁶अउर अगर हम सुसमाचार सुनाई, तउ हमार कछु घमन्डु नाई, काहे ते ई तउ हमार खातिर अवस्य हइ अउर अगर हम सुसमाचार न सुनाई तउ मोहि पै हाय। ¹⁷अगर अपन इच्छा तेइ करति हइ तउ मजदूरी मोहिका मिलति हइ अउर अगर अपनी इच्छा ते नाई करति, तउ भंडारी केर कामु मोहिका सौपइ गवा हइ। ¹⁸यहिते हमारि कउन मजदूरी हइ? ई कि

सुसमाचार सुनावइ म हम मसीह क सुसमाचार सेत मेत करि देउ। (बेकार कइ देउ) हियन तलक कि सुसमाचार म जउनु हमार अधिकार हइ, उहिका हम पूरी रीति ते काम म लाई।

¹⁹काहे ते सबहिन ते सुतंतर होइ पैहूँ हम अपन आपु क सबहिन क दासु बनाई दीन हइ, जेहिते अधिक लोगनु क घसीट लाई। ²⁰हम यहूदिन केर खातिर यहूदी बना जेहिते यहू दिन क खींचि लाई, जउन जने बेवस्था क अधीन होई, उइके खातिर हम बेवस्था क अधीनन होइ पैहूँ। बेवस्था के अधीन बनेन जेहिते उइ जौनु बेवस्था कि अधीन हइ खींचि लाई। ²¹बेवस्था हीनन के खातिर भई (जउन परमेसुर कि बेवस्था ते हीन नाहीं, मुला मसीह कि बेवस्था कै अधीन हउं) बेवस्था हीन जइस बनेन जेहिते निरबलन क खींचि लाई। ²²हम सबै मनइन के खातिर सब कुछ बने हउं, जेहिते कउनउ न कउनउ रीति ते कइयौ का उद्धार करउं। ²³अउर हम सबै कछु सुसमाचार कै खातिर करति हउं कि अउरनि के साथ ऊ का भागीदार होइ जावै?

²⁴का तुम नाई जानति कि दौड़ म सबही दौड़त हइ, मुला इनामु एकै क मिलत हइ। (एकै लै जाति हइ)? तुइ वैसेइ दौड़िय कि जी जाव।

²⁵अउर हर एकु पहलानु सबइ परकार क संयम करत हइ, उइ तौ एकु मुरझाइ वालेइ मुकुट पावइक खातिर ई सबु करति हइ, मुला हम तौ, उइ मुकुट के खातिर कहति हइ जउनु मुरझाइक नाई। ²⁶एहिते हम तौ एई रीति ते दौड़ति हउं। मुला उइ ठिकाने नाई, हमहूँ ई रीति ते मुक्कन ते लड़ति हइ मुला उइ की नाई नाई जउन हवा पीटत भये लड़ति हइ। ²⁷मुला हम अपन देह क मारत कूटत अउर बस मा लाइत हइ। अइस न होय कि औरन क परचार करिके हम आपहिन कउनउ रीति ते निकम्मा ठहरी।

इसराएल केर इतिहास सइहन चेतावनी

10 हे भाइयों, हम नाहीं चाहित कि तुइ ई बात ते अनजान रहौ कि हमार सबै बाप दाउद बादर के नीचेइ रहै अउर सब के सबय समुंदर के बीचु ते पार हुइ गये। ²सबहिन बादर मां अउर समुंदर म मूसा क बपतिसमा लिहिन। ³सबहिन एकउ आतमा क भोजनु किहिन। ⁴सबहिन एकुर आतमा क पानी पिहिन, काहे ते उइ ऊ आतमा चट्टान ते पियत रहै, जउन उइके साथ चलति रहै अउर ऊ चट्टान मसीह रहै। ⁵मुला परमेसुर उइ मा बहुतरिन ते परसन्न नाई भए यहिते उइ जंगलु म मरि मिटे।

⁶ई बातइ हमार खातिर मसल तउ ठहरी, कि जइस उनहन लालचु कौन, वैसइ हम बुरी बस्तुन क लालचु न करी। ⁷अउर न तुइ मूरति पूजइ वालेन बनउ, जइस कि उइ मते कइयउ, बनि गए रहै, जइस लिखउ हइ कि लोग खाइ—पियइक बैठे अउर खेल कूद के उठे। ⁸न हम वेभिचारु करी, जइस उनहिन म ते कइयउ किहिन, अउर एकै दिन म तेइस हजार लोग मरि मिटे। ⁹न हम परभु का परिखी, जइस उइमा ते कइयउ किहिन, अउर सापन ते नास किये गये। ¹⁰न तुइ कुड़कुड़ाय, जेहि रीति ते उइ मा ते कितनेउ कुड़कुड़ाय अउर नास करन वाले ते नासो किए गये।

¹¹ई सबै बातें जउन उइ पै पड़ी, दिरिस्तान्तन रीति पै रहै अउर उइ हमार चिंताउनिक खातिर जउनु जगत के अन्तिम समय म रहति हयं लिखी गइ रहै। ¹²यहिते जउन समझति हइ कि हम स्थिर हउं, ऊ चौकस रहइ, जेहिते कहूँ गिरि न परै। ¹³तुइ कउनउ ऐस परिच्छा मा नाई परे जउन मनइक बरदास्त कै बाहर हइ। परमेसुर सच्चा विसवासु जोग है बहु तोहरे सामरथ ते बाहर परीच्छा म न परे देइ, बल्कि परिच्छउ क साथे निकासो करिहइ, कि तुइ सहि सकै।

मूरति पूजा का त्यागबु

¹⁴ई कारन हे हमार पियारो मूर्ति पूजा ते बचइ रहेउ। ¹⁵हम बुझिमान जानि कइ तोहिते कहित हन, जउन हम कहति हो उइ का तू परखौ। ¹⁶ऊ धनयवातु क कटोरा, जेहि पै हम धन्यवातु करति हइ, का मसीह क द्याह साक्षेदारि नाई? ऊ रोटी वहिका हम तोडित हइ, का ऊ मसीह की देह की सहभागिता म नाई। ¹⁷यहिते कि एकइ रोटी हइ, ऊ हमहुक जउन बहुतै हइ, एकु देह हइ, काहे ते हम सबकी ऊ एकइ रोटी म भागी होत हइ।

¹⁸जउन सरीर क भाव ते इसराएली हय, उइको देखो। का बलिदानन केर खाय वालेन बेदी के सहभागी नाहीं हन? ¹⁹फिर हम का कहत हन? का यह कि मूरति का बलिदानन कछु हइ, या मूरति कछु हइ? ²⁰नाई, बल्कि ई कि दूसरे धरम मानइ वाले जउन बलिदान करति हइ, हम नाई चाहित कि तुइ दुस्त आतमन क सहभागी होउ। ²¹तुइ परभु क कटोरे अउर भूतातमन के कटोरे दूनउ मते नाई पी सकत। तुइ परभु की मेज अउर दुस्त आतमन की मेज दूनउ के भागी नाई हुइ सकत। ²²का हम परभु क गुस्सा दिलाइत हइ? का हम उइते सकतिमान हइं।

विसवासिन केर आजादी

²³सबै बस्तुन हमार खातिर उचितइ तौ हइ, मुला

सबै लाभ की नाई सबइ बसतुवै हमार खातिर उचित तउ हइ मुला सबै बसतुवन ते उन्नति नाई। ²⁴कोऊ अपनि भलाई क न दूहै बल्कि औरनि की।

²⁵जउन कछु कसाइन केर हियाँ विकति हइ, वहु खाउ। अउर विवेकु के कारन कछु न पूछउ। ²⁶काहे ते धरती अउर उइकी भरपूरी परभु की हइ।

²⁷अगर अविस्वासिन म ते कोऊ तूहै नेउता देय अउर तुइ जाव चाहउ तउ जउन कछु तोहार समुहे रक्खा जाए, वहइ खाउ अउर विवेक के कारन कछु न पूछौ। ²⁸मुला अगर कउनउ तुमते कहइ कि ई तौ मूरति क बलि की भई बसतू हइ तउ वहि बतावै वालेन क कारन अउर विवेक के कारन न खाउ। ²⁹हमार मतलबु तोर विवेकु नाई, मुला उइ दुसरे क विवेकु हइ। भला हमारि सुतंतरता दुसरेक विचार ते काहे परखी जाइ। ³⁰अगर हम धन्यवातु करि कइ नाम धराई होइत, तौ जेहि पै हम धन्यवाद करत हउं, ऊ के कारन हमार बदनामी काहे होति हय?

³¹सो तुइ चाहेइ खाउ चाहेइ पियउ, चाहेइ जउन कछु करउ सबइ कछु परमेसुर की महिमा की खातिर करउ। ³²तुइ न यहूदिन क, न यूनानिन क, अउर न परमेसुर कि कलीसिया की खतिर ठोकरु क कारन बनउ। ³³जइस हमहूँ सबइ बातन म, सबहिन केर परसन्न रक्खित हइ अउर अपन नाई मुला बहुतन को लाभु दूहति हइ कि उइ उद्धार पावइ।

11 तुइ हमार जइस चालु चलउ, जइस हम मसीह कि जइसी चालु चलति हइ।

अराधना ही हमारी मरयादा हय

²हे भाइयो, हम तूहै सराहति हइ, कि सबइ बातन म मोहिका सुमिरन करत हउ अउर जउन चलन हम तूहै सौपि दिहेन कउनउ पालन करत हउ।

³सो हम चाहित हइ कि तुइ यहु जानि लेई कि हर एकु मनई क सिर मसीह हइ अउर इस तरिक सिर मनई हइ अउर मसीह क सिर परमेसुर हइ। ⁴जउन पुरुस सिर ढांके भये पराथना या भविसवानी करति हइ, ऊ अपने सिर क अपमानु करति हइ। ⁵मुला जउन मेहरारु उधारे सिर पराथना या भविसवानी करति हइ ऊ अपन सिर क अपमानु करति हइ, काहे ते ऊ मुंडी के बराबर हइ। ⁶अगर औरत ओढ़नी न ओढ़े बालउ कटाइ लेइ, अउर औरत का बाल कटाउब अउर मुड़ाउब लज्जा कि बात हइ तो ओढ़नी ओढ़ै। ⁷हां मनई क अपन सिर ढाकब उचित नाई काहे ते ऊ परमेसुर क सरुप अउर महिमा हइ, मुला

अउरत मनइ क महिमा।⁸काहे ते मनई अउरत ते नाही भवा, मुला अउरत मनई ते भई हय।⁹अउर मनइ अउरत के खातिर नाई सिरजा गवा है मुला औरत मनई की खातिर सिरजी गई है।¹⁰यहि ते सुरगदूतन के कारन औरत क उचित हइ कि मान मरजादा अपन सिर पै राखई।

¹¹तउनौ परभु न तौ मेहरारु बिना मनई, अउर न मनई बिना मेहरारु क हइ।¹²काहे ते जइसइ मनई ते हइ वइसइ मनई अउरत ते हइ, मुला सबइ वस्तुइ परमेसुर ते।¹³तुइ आपहिं विचारु करइ, का अउरत क उवाड़े सिर परमेसुर ते पराथना करब सोहत हइ।¹⁴का स्वाभाविक रीतिउ ते तुइ नाई जानत कि अगर मनई लम्बे बाल राखइ तउ उहिके खातिर अपमानु होई।¹⁵मुला अगर औरत लम्बे बाल राखइ, तउ वहिके खातिर दिए गए हइ।¹⁶मुला अगर कउनउ विवादु करा चाहइ तउ यहु जानइ कि न हमारि अउर न परमेसुर की कलीसियउ की ऐइस रीति हइ।

परभु का आखरी भोज

¹⁷मुला ई आग्या देत भये हम तोहिका नाहीं सराहति। यहिते कि तोहर इकट्टे होइ ते भलाई नाई मुला हानि होति हइ।¹⁸काहे ते पहिले तउ हम ई सुनति हइ कि जबै तुइ कलीसिया म इकट्टे होति हउ, तउ तुइमा फूट होति हइ, अउर हम कछु-कछु परितोतउ करति हउं।¹⁹काहे ते विवाद तुइ मा जरुर होइ हइ, यहि ते कि जउन लोग तुइमा खरे निकलि हइ, उइ परगट हुइ जाय।²⁰सो तुइ जउन एकै जगह म इकट्टे होत हउ तउ ई परभु भोजु खाइक खातिर नाई।²¹काहे ते खाइके समय एकु दुसरे ते पहिले अपन भोजन खाइ लेति हइ, सो कोऊ तउ भूखा रहति हइ, अउर कउनउ मत वाला हुइ जाति हइ।²²का खाइ-पियइक तोहार घर नाई? या परमेसुर की कलीसिया क तुच्छ जानति हउ, अउर जउनउ कि पास नाई हइ, उइका लज्जत करत हउ? हम तुमते का कही? का ई बात म तोहार परसंसा करउ? हम परसंसा नाई करत।

²³काहे ते ई बात मोहि पै परमेसुर ते पहुंची हइ अउर हम तुमहुक पहुंचाई दीन कि परभु यीसु मसीह जउन रात ऊ पकड़वावा गवा रोटी लिहिस।²⁴अउर धन्यबादु करिकइ उइका तोरिस अउर कहिसि ई मोर देह हइ, जउन तोहरे खातिर हइ, हमार सुमिरन के खातिर यहइ किया करौ।²⁵यहि रीति ते उइ भोजन पीछे कटोरौ लिहिस अउर कहिसि ई कटोरा हमार लोगन ते नई वाचा हइ, जबै कबहूँ पियेउ, तउ हमार

समरन के खातिर इहइ किय करउ।²⁶काहे ते जब कबहूँ तुइ ई रोटी खात अउर ई कटोरे म ते पियति हउ, तउ परभु क जब तलक ऊ न आवइ, परचार करत रहउ।

²⁷ई ते जउन कउनउ अनुचित रीति ते परभु रोटी खाइ या उहिके कटोरे मते पियइ ऊ परभु क देह अउर लोहू क अपराधी ठहरी।²⁸यहि ते मनई अपन आपु क जांचि लेइ अउर यहि रीति ते ई रोटी मा ते खाई अउर ई कटोरे मा ते पियइ।²⁹काहे ते जउनु खाति-पियति समय परभु क देह क न पिहचानै ऊ ई खाई अउर पियइ ते अपने पै दन्दु लावति हइ।³⁰यही कारनन तुइ मा बहुतेरे निरबल अउर रोगी हइ अउर बहुते सुति गये हय।³¹अगर हम अपन आपु क जांचति तउ दन्दु न पाइत।³²मुला परभु हमे दन्दु दैके हमारि ताड़ना करति हइ यहिते कि हम संसारु के साथ दोसी न ठहरइ।

³³यहिते हे हमरे भइयौ जबइ तुइ खाइके खातिर इकट्टे होति हउ तौ एकु दुसरे के लिए रुका करौ।³⁴अगर कउनउ भूखा होय तौ अपन घर मां खाइ लेइ जेहिते तोहार एकट्टा होउब दन्दु क कारनु न होय, अउर बाकी बातन क हम आइके ठीक करि देहौं।

आतमीक वरदानन

12 हे भाइयौ हम नाई चाहित कि तुइ आतमा के बरदानन के बारे मां अपरिचित रहौ।²तुइ जानति हइ कि जबै तुइ दूसर धरम क मानइ वाल रहौ, तबै गूगी मूरतिन क पाछे जैसेइ, चलाये जात रहौ वैसेइ चलति रहो।³यहिते हम तुहै चिताय देइत हन कि जउन कउनउ परमेसुर कि आतमा कि अगुवाई ते बोलति हइ, ऊ नाई करि हइ, कि यीसु सरापति हइ, अउर न कउनउ पवित्तर आतमा के बिना कहि सकति हइ, कि यीसु परभु हइ।

⁴बरदानु तउ कइयउ परकार के हइ, मुला आतमा एकै हइ।⁵अउर सेवउ कइयउ परकार की हइ, मुला परभु एकइ हइ।⁶अउर असरिदार काम कइयउ परकार क हइ, मुला परमेसुर एकइ हइ, जउन सबै मा हर परकार क परभाव पैदा करत हइ।

⁷मुला सबन क लाभु पहुंचावइ कि खातिर हर एकु क आतमा क परकास दियइ जाति हइ।⁸काहे ते एकु क आतमा ते ज्ञान की बातन क दीन जाति हइ, अउर दुसरे क उइ आतमा कि मुताबिक गियान की बातन क।⁹अउर कउनउ क उहै आतमा ते विसवासु अउर कउनउ क उहै एकु आतमा ते चंगा करइ क बरदानु दीन जाति हइ।¹⁰फिर कउनउ क

सामरथ कै कारज करे क सकती, अउर कउनउ क भविस कि बानी केर, अउर कउनउ क आतमन की परख केर, अउर कउनउ क अनेक परकार कि भासन क, अउर कउनउ क भासन क अरथ बतावै क।¹¹मुला ई सबै परभावसाली कारज उहै आतमा करवावत हइ, अउर जेहिका जउन चाहति हइ, वहु वहि देति हइ।

एकु देह अनेकन भाग

¹²काहे ते जेहि परकार ते देह तौ एकै हइ अउर उहिके अंग बहुतै हइ, अउर उइ एकु देह के सबै अंग, बहुतइ होइउ पै सबै मिलि कइ एकहि देह हइ। उइ परकार मसीहो हइ।¹³काहे ते हम सबै का यहूदी, का यूनानी का दास, का सुतंतर एकहि आतमा ते एक देह होइके खातिर बपतिसमा लिहेन अउर हम सबन क एकइ आतमा पिलाइ गइ।

¹⁴यहिते कि देह म एकै अंग नाई, मुला बहुतेरे हइ।¹⁵अगर पाँव कहइ कि हम हाथु नाहीं एहिते देह क नाई है? अउर अगर कानु कहइ।¹⁶कि हमं आंखि नाई, यहिते देह क नाई हय? ¹⁷अगर सारी देह आंखि की होति तउ सुनब कहां ते होत? अगर सारी देह का नहि है तउ सूँघब कहां ते होत।¹⁸मुला सचमुच परमेसुर अंगन क अपनि इच्छा कि मुताबिक एकु—एकु करिकइ देह म रखा हइ।¹⁹अगर उइ सबै एक हि अंग होत, तउ देह कहां ते होत।²⁰मुला सबै अंग तउ बहुतै हइ मुला देह एकै हइ।

²¹आंखि हाथु ते नाई कहि सकत कि मोहिका तोहार जरूरत नाई अउर न सिर पाँवन ते कहि सकति कि मोहिका तोहार परयोजन नाई।²²मुला देह के उइ अंग जउन औरत ते निरबल देखि परत हइ, बहुतै जरूरी हइ।²³अउर देह के जउन अंगन क हम आदरु के योग नाई समझति हइ, उनहिन क हम आदरु देहत हइ, अउर हमरेइ सोभाहीन अंग अउरउ बहुतय सोभायमान होई जाति हइ।²⁴फिरौ हमार सोभायमान अंगन क इहका परयोजन नाई, मुला परमेसुर देह क अइस बनाइ दीन हइ कि जउन अंग क घटी रहै वहिक औरउ बहुत आदरु होय।²⁵यहिते देह म फूट न परै, मुला अंग एकु दुसरे की बराबर चिनता करइ।²⁶यहिते अगर एकु अंग दुख पावति हय अउर अगर एकु अंग की बड़ाई होत हइ तउ उइके साथइ सबै अंग आनन्दु मनावति हइ।

²⁷यहि परकार तुइ सबै मिलिकइ मसीह की देह हउ। अउर अलगै अलग ऊ के अंगु हउ।²⁸अउर परमेसुर के कलीसिया म अलगै अलग मनई नियुक्त

किए हइ, पहिल परेरित दूसरि भविसवकता, तीसर सिच्छक, फिर सामरथ कइ कारज करै वाले, फिर चंगा करइ वाले अउर उपकार करै वाले अउर पराथना अउर नाना परकार की भासा बोलइ वाले।²⁹का सबै परेरित हइ? का सब भविस क कइह वाले हइ। का सबै उपदेसक हइ? का सबै सामरथ के कारज रकइ वले हइ।³⁰का सबन क चंगा करइ क बरदानु मिला हइ? का सबै नाना परकार कि भासा बोलति हइ।³¹का सबै अनुवाद करति हइ? तुइ बड़े ते बड़ा बरदानु कि धुन म रहउ। मुला हम तुहै अउर उ सबते उत्तम मारग बताइत हइ।

परेम

13 मगर हम मनइन क अउर सरग दूतन कि बोलिन क बोली अउर परेम न राखूं तउ हम हुनहुनात पीतलु अउर इनझनात भई झांझ हउं।²अउर अगर हम भविसवानी कर सकऊ अउर सबै भेदन अउर सबै परकार के गियान क समुझत अउर मोहि इहां तलक विसवासु हइ कि मइ पहारन क हटाइ देई, मुला परेम न रकखउ तौ हम कछुइ नाई।³अउर अगर हम अपन पूरी सम्पत्ति क कंगालन क खिलाय देई या अपने देह जरावै कि खातिर दे देई अउर परेम न रकखी तउ मोहिमा कउनउ नाई।

⁴परेम धीरजुवन्त हइ। अउर किरपालु हइ, परेम इरखा नाहीं करत, परेम अपन बड़ाइ नाहीं करति, अउर फूलति नाहीं।⁵ऊ उन रीति ते नाई चलति, ऊ अपन भलाई नाई चाहति, झुझलात नाई, बुरी नाई मानति।⁶कुकरम ते खुसी नाई होत। मुला सत्य ते खुसी होति हइ।⁷सबै बातन क सही लेति हइ। सबै बातन क पिरेमु करति हइ, सबै बातन कि आसा राखति हइ, सबै बातन मां धीरजु धरति हइ।

⁸परेम कबहू टरति, नाई, भविसवानिन होई तौ समापति हुइ जाई, भासाए होई तउ जाती रहिहई। गियान होई तउ मिटि जाई।⁹कहाते हमार गियानु अश्रुइ हइ अउर हमार भविसवानी अश्रुी।¹⁰मुला जबै सब मां सिद्ध आई तउ अधरउ मिटि जाई जबै हम बालकु रहा।¹¹तउ हम बचवन की नाई बोलत रहा। बालकन जइस मन रहै, बालकन जइसि समझ रही, मुला जबै सयान भएन तउ लरकइयां कि बाते छांड़ि दीन।¹²अब हमका सीसा धुंधला सा दिखाई देत हइ, मुला उइ समय आसमानेइ सामने देखिहौ, ई समय हमार गियान अधूरे हइ, मुला उइ समय एसिहय पूरी किहिन पहचानिव, जइस हम पहिचाने गयन हई।

¹³मुला अब विसवासु, आसा परेम ई तीनों अस्थाई हई। मुला इनहुन मां सबन ते बड़इ पिरेम हइ।

भविस केर बाते बतावै अउर बहुती बोली ब्वाले केर बरदानु

14 पिरम क नकल करउ, अउर आतम क बरदानौ का धुन म रहउ, विसेस कइ यहु कि भविसबानी करउ। ²काहे ते जउन दूसरि भासा म बातइ करति हइ, ऊ मनइन ते नाई, मुला परमेसुर ते बातन क, आतमा म होइकै बोलाते हई। ³मुला जउन भविसबानी करति हइ, ऊ मनइन ते उन्नति अउर उपदेसु अउर सान्ती कि बातन क कहति हइ। ⁴जउन दूसरि भासा म बात करति हइ, ऊ अपनिहि उन्नति करति हइ, मुला जउन भविस की बानी करति हइ ऊ कलीसिया की उन्नति करति हइ। ⁵हम चाहति हउं कि तुइ सबहिन दूसरि भासन मा बतलावा करौ, मुला अधिकतर इहइ चाहति हउं कि भविसबानी करउ, काहे ते अगर दुसरिउ भासन क बोलइ वाले कलीसिया की उन्नति की खातिर अनुवादु न करै तौ भविस बानी करइ वाले ऊ ते बड़ि कइ हइ।

⁶यहिते हे भाइयों अगर हम तोहरे पास आइकइ दूसरी भासन म बतुआई करी, अउर परकास, या गियानु या भविस की बानी या उपदेसु कि बातइ तुइते न कहउं, तउ मोहिते तुमहुक का लाभु होई। ⁷ई परकार ते अगर निरजीव चीजें जउन ते सुर निकरत हइ जैसइ बांसुरी या बीनु, अगर उनके स्वरनन भेदु न होय तौ जउनु फूँका या बजावा जात इ ऊ कहिते पहिचानु जाई? ⁸अउर अगर तुरही क सबद साफ न होई तउ कउनु लड़ाई के खातिर तइयारी करहिइ। ⁹ऐसइ तुमहूँ अगर जीभ ते साफै साफ बातन का कहिहउ तउ जउन कछु कहा जाति हइ ऊ कहिते समझा जाई? तउ हवा ते बातें करइ वाले ठहरिहौ? ¹⁰दुनिया म कितनेइ परकार की भासायें काहे न होय, मुला उनहुन म कउनु बिना अरथ कि नाई होइहई चहिते। ¹¹अगर हम कउनु भासा क मतलब न समझउ तउ बोलन वालेइ की नजर म परदेसी ठहरि हउं अउर बोलइ वाल हमार नजर म परदेसी ठहरि। ¹²यहिते तुमहूँ जब आतक बरदानन कि धुन म हउ, तउ ऐसइ पर यतन करउ कि तोहरे बरदानन की उन्नति ते कलीसिया कि उन्नति होय।

¹³ई कारन जउन दूसरि भासा बोलइ तउ ऊ पराथना करइ कि उनका अनुवादौ करि सकै। ¹⁴ई ते अगर हम दूसरि भासा म पराथना करउं, तौ हमार आतमा पराथना करति हइ, मुला हमार बुद्धि कारज

नाई करति। ¹⁵सो का करैक चाहिय? हम आतमौ तो पराथन करि हउ अउर बुद्धिउ ते पराथना करहिउं, हम आतमा ते गइहउ अउर बुद्धिउ ते गाइब। ¹⁶नाई तउ अगर तुइ आतमइ ते धन्यवाद करिहौ, तउ फिर अगियानी तोर धन्यवाद पै आमीन कइसे कहिहै? यहिते कि ऊ तउ नाहीं जानत कि तुइ का कहति हइ। ¹⁷तुइ तौ भली—भांति ते धन्यवादु करति हउं, मुला दुसरे कि उन्नति नाहीं होति।

¹⁸हम आपन परमेसुर क धन्यवाद करति हउ कि हम तुइ सबहिन ते अधिकइ दूसरिन भासन म बोलति हइ। ¹⁹लकिन कलीसिया म दूसरि भासा म दस हजार बातन कहे तेइ मोहि अउर उ ठीक जानि परत हइ, कि अउरन के सखावै क खातिर बुद्धी ते पांचइ बातन क कहौ।

²⁰हे भाइयों, तुइ समझ म लरिका न बनउ। बुराई म तउ बालक रहौ मुला समझ म सियाने बनउ। ²¹बेवस्था म लिखउ हइ कि परभु कहति हई, हम दूसरि भासा बोलइ वालइ कि खातिर अउर पराये मुख ते इन लोगन ते बातइ करिहउं तउनउ उइ हमार न सुनिहई।

²²यहिते दुसरी—दुसरी भासा विसवासिन के खातिर नाई मुला अविस्वासिन के खातिर नाई मुला विसवासिन के खातिर निसानी हइ। ²³यहिते अगर कलीसिया याक जगह यकड़ी होय अउर सबइ कइ सबै दूसरि—दूसरि भासन बोलइ अउर अनपढ़े या अविस्वासी लोग भीतर आइ जाय तउका उइ तुहि पागल न कहिहै? मुला अगर सब भविसबानी करइ लगइ। ²⁴अउर कउनु अविस्वासी या अनपढ़ा मनइ भीतर आइ जाइ तौ सबै उहिका दोसी ठहराइ देहै। अउर परिख लइहै। ²⁵अउर ऊ के मन क भेदु परगट हुइ जइहै, अउर तवै ऊ मुहैक बल गिरि कै परमेसुर क दन्डवत करिहै अउर मानि लइहै, कि सचमुच परमेसुर तुम्हरेइ बीच म हइ।

उपासना म अनुसासन केर जरूरत रहे के चाही

²⁶यहिते हे भाइयों, का करइक चाही? जबइ तुइ यकट्टा होत हउ, तउ हर एक के हिरदय म भजनु या उपदेसु या दूसरि भासा, या परकार या दूसरि भासा क अरथु बतावइक रहति हइ। सबै कछु आतमा की उन्नति के खातिर होइक चाही। ²⁷अगर दूसरि भासा म बतुवावै करइक होइ, तउ दुइ—दुइ या बहुत होय तउ तीन—तीन जन बारी—बारी ते बोलइ अउर एकु जनै अनुवादु करइ। मुला अगर अनुवादु करइ वालन न होय। ²⁸तउ दूसरि भासा बोलइ वाला कलीसिया

मा सान्त रहइ अउर अपन न ते अउर परमेसुर ते बातइ करै।²⁹ भविसवकतन माते दुइ या तीन बोलै, अउर सेस लोग उइके बचनन क परखई।³⁰ मुला अगर दुसरे प जउन बैइठइ हइ कछु ईसवरीय परकास होइ तो पहिला चुप हुइ जाय।³¹ काहे ते तुइ सबै एकु—एकु करिकै भविसवानी करि सकत हउ जेहिते सब सीखै अउर सब सानती पावै।³² अउर भविसवकतन कि आतमा भविसवकतन के बस मां हइ।³³ काहे ते परमेसुर गड़बड़ी क नाहीं, मुला सान्ती के करता हइ, जइस पवित्तर लोग सब कलीसियन म हइ।³⁴ औरतें कलीसिया की सभा म चुप रहइ काहे ते उनका बातन क करइक आग्या नाहीं मुला अधीन रहइ कि आग्या हइ, जइस बेवस्था म लिखौ हइ।³⁵ अउर अगर उइ कछु सीखउ चाहै, तो घरमा अपन—अपन मरदन ते पूछै, काहे ते औरत क कलीसिया म बातन क करब लज्जा केर बात हइ।

³⁶ परमेसुर क बचन तुइ मा ते निकरा हइ? या केवल तुइ तकै पहुंचावत हइ? ³⁷ अगर कउनउ मनई अपन आपु क भविसवकता या आतमन क जन समझै तउ ई जानि लेइ कि जउन बातन क हम तुमका लिखति हउ, उइ परभु की आग्यायें हई।
³⁸ मुला अगर कउनउ न जानेइ तउन जावइ।

³⁹ यहिते हे भइयौ, भविसवानी करइ की धुन मा रहउ अउर दूसरि भासा बोलइ ते मना न करो।
⁴⁰ मुला सबही बाते सुचारु अउर क्रम के मुताबिक की जावैं।

मसीह जीवितो हुई

15 हे भाइयो, हम तुहै उइ सुसमाचार बताइत हइ जउन पहिलेइ सुनि चुकेन हइ। जिन्हका तुमहू अंगीकारु किए रहौ, अउर जेहिमा तुइ स्थिरौ हउ।
² अगर ऊ सुसमाचारु क जउन हम तुहै सुनाएन रहइ, सुमिरन राखति हउ तउ उहिय ते तोहार उद्धार होति हइ, नाहीं तउ तोहार विसवासु करब बेकार भयउ।

³ ये ही कारन हम सबते पहिले तुहै वहै बात पहुंचाइन, जउन मोहि पे पहुंची रहै कि पवित्तर सास्तर केर मुताबिक यीसु मसीह हमार पापन के खातिर मुआ।
⁴ अउर गाड़ि दिया गवा अउर पवित्तर सास्तर के मुताबिक तीसरे दिन जीवितौ हुइ गवा।
⁵ अउर कैफाक तबै बारहन क दिखाई दिन।
⁶ फिर पांच सौ ते अधिक भाईन क एकै साथ दिखाई दिन जिनमा ते बहुतेरे अबहिन तक मौजूद हई, मुला कितनेइ सुनि गये।
⁷ फिर याकूब का दिखाई दिन तब सबइ परेरितन क दिखाई दिन।
⁸ अउर सबहिन के बाद मोहिका

दिखाई दिन जउन मानउ अधूरे दिनन क जनमा हउ।

⁹ काहे ते हम परेरितन म सबते छोट हउं, बल्कि परेरित कहलावै क जोग नाई, काहे ते हम परमेसुर कि कलीसिया क सातएन रहै।
¹⁰ मुला हम जउन कछुइ हउं, परमेसुर क मुताबिक होते हउं अउर उइ का अनुगरह जउन मोहि पै भयो ऊ बेकार नाई भयो, मुला हम उइ सबन ते बढ़ि कइ परिसरमौ कीन, तबहू ई मेरी ओर ते नाई भवा मुला परमेसुर क अनुगरह उ जउन मो पै रहै।
¹¹ वहु चाहै हम होउ, चाहै उइ होइ हम इहै परचार करति हइ अउर इहै पै तुमहू विसवासु कियेउ।

मुरदा मनई हो दुईकारा जी जइहें

¹² यहिते जवै मसीह क यहु परचार कियइ जात हइ, कि ऊ मरे हुएन मरे मा ते जी उठा तऊ तुम मा ते केते काहे कहित हइ।
¹³ कि मरे हुअन क पुनरुत्थान नाई तउ मसीहउ नाइ जी उठा।
¹⁴ अउर अगर मसीह नाई जी उठा तो हमार परचार करब बेकार हइ? अउर तोहार विसवासौ बेकार हइ। अगर परमेसुर मसीह क नाई जिलाइन अउर अगर मरे हुए नाई जी उठेत।
¹⁵ तउ हम परमेसुर के झूठे गवाह ठहरे, काहे ते परमेसुर क बारे म ई गवाही दी कि उहि मसीह क जिलाइ दिहिस।
¹⁶ अउर अगर मुरदे नाई जी उठेत तउ मसीहउ नाई जी उठा।
¹⁷ अउर यहि मसीह नाई जी उठा तउ तुम्हार विसवासु बेकार हइ अउर तुइ अबहिन तलक अपने पापन म फंसे हउ।
¹⁸ मुला जउन मसीह म सोइ गए हइ उइ ऊ नास भये।
¹⁹ अगर हम केवल यही जीवन मसीह ते आसा राखति हइ तउ हम सबै मनइन से अधिकइ अयोग्य हइ।

²⁰ मुला सचमुव मसीह मुरदन मते जी उठा हइ अउर जउन मसीह म सोइ गये हइ। उइ मा पहिल फलु भयेउ।
²¹ काहे ते जवइ मनई ते मिरतु आई तउ मनइय कि जरिये मरे हुएन क पुनरुत्थान आयउ।
²² अउर जइस आदम म सब मरत हई वैसेइ मसीह म सब जिलाये जइहैं।
²³ मुला हर एकु अपन—अपन क्रम ते, पहिल फलु मसीह, फिर मसीह के आवइ पर उहिके लोग।
²⁴ ई के बाद अन्त होई। ऊ समय ऊ सारी परधानता अउर सारइ अधिकार अउर सामरथ क अन्त करिकइ राज क परमेसुर बाप के हाथन म सौंपि देई।
²⁵ काहे ते जब तलक कि ऊ अपन बैरिन क अपन पांड तले नाई लइ आई, तबै तलक ऊ का राज करब जरूरी हइ।
²⁶ सबते अन्तिम बैरी जउन नास किया जाई ऊ मरतू हई।
²⁷ काहे ते

परमेसुर सबै कछु ऊ के पावन तले करि दीन गवा हइ। ई ते साफ हइ कि जे सबइ कछु ऊ के अधीन करि दिया गवा। ऊ आपहि अलगइ रहा।²⁸अउर जबइ सबइ कछु ऊ के अधीन हु जइहैं, तउ बेटवा आपहि ऊ के अधीन हुइ जइहैं, जैसे सबै कछु ऊ के अधीन करि दिहिस, काहे ते सबइ मां परमेसुर सब कछु हइ।

²⁹नाहीं तौ जउन लोग मरे हुएन के खातिर बपतिसमा लेत हइ, उइ का करिहैं अगर मुरदेउ न जी उठति, तउ फिर काहे उइके खातिर बपतिसमा लेत हइ।³⁰अउर हमहूँ काहे हर घड़ी जोखिम म परे रहति हइ।³¹हे भइयो, मोहिका उइ घमन्डु कि कसम जउन हमार मसीह यीसु म हम तोहरे बारे म करति हई, कि हम हर दिन मरति हन।³²अगर हम मनई की रीति पै इफिसुस म बन पसुन ते लड़ेन, तउ मोहिका का लाभु भवा? अगर मुरदे जिलाये लाहीं जइहैं तौ आपउ खाई—पी, काहे ते काल्हि तौ मरिही जाएक हवै।³³धोखन खायेउ बुरी संगति अच्छेउ चरित क बिगारि देत हइ।³⁴धरम के खारित जागि जाउ, अउर पापन करउ, काहे ते कितनेइ अइसे हई जउन परमेसुर क नाहीं जानत, हम तुहै लज्जित करै के खातिर ई कहति हउ।

देह केर दुबारा जीवित होये केर बारे मा बात

³⁵अब कउनउ ई कहि है कि मुरदे कउन रीति ते जी उठति हई अउर कैसी देह के साथ आवति हई।³⁶हे मूरख जउन कछु तुइ बोलति हइ, जब तलक ऊ न मरे जिलायउ नाहीं जाति।³⁷अउर जउन तुइ बोवति हई। उई देह नाहीं पैदा होइ वाली हइ, मुला निरादाना हइ। चाहे गेहूँ क चाहे कौनउ अउर अनाजु क।³⁸मुला परमेसुर अपन इच्छा कि मुताबिक उइका देह देति हइ, अउर हर एक बीज क उइकी विसेस देह क।³⁹सबै सरीर एकै जइस नाई, मुला मनई केर सरीर अउर हइ, पसुन क सरीर अउर हइ, पच्छिन, क सरीर अउर हइ, मछरिन क सरीर अउर हइ।⁴⁰सरगौ कि देह हइ, अउर मिरतक देहैं हई, मुला सरग कि देहन क तेजु अउर हइ अउर पारथव क अउर।⁴¹सूरज क तेजु अउर हइ चांद क तेजु अउर हइ अउर तारागनन क तेजु अउर हइ। काहे ते एक तारे ते दूसर तारे क तेज म अन्तरु हइ।

⁴²मुरदन क जी उठवौ ऐसइ हइ। सरीर नासमान दसा म बोवा जात हइ, अउर अविनासी रूप म जी उठति हइ।⁴³ऊ अनादर के साथ बोवा जात हइ, अउर तेज के साथ जी उठति हइ। निरबलता के साथ

बोवा जात हइ, अउर सामरथ के साथ जी उठति हइ।⁴⁴पराकिरतिक देह बोई जाति हइ अउर आतमा कि देह जी उठति हइ। जबइ स्वाभाविक देह हइ, तौ आतमा कि देहौ हइ।⁴⁵ऐसेइ लिखउ हइ कि पहिल पुरुस यानी आदम, जीवित परानी बना अउर आखिरी आदम, जीवनदायक आतमा बना।⁴⁶मुला पहिले आतमा क नाई रहै, मुला भौतिक रहै, ई के बादि आतमिक भवा।⁴⁷पहिल मनई धरती ते, यानी मिट्टी केर हई, दूसर मनइ सरग क हई।⁴⁸जइस ऊ सरग क रहै, वैसेइ अउरउ मिट्टी क हई। जइस ऊ सरग क हई, वइसइ औरउ सरग क हई।⁴⁹जइसे हम ऊ का रूप जउन मिट्टी का रहै धारन किहिस वैसइ उइ सरगउ क रूप धारन करि हई।

⁵⁰हे भाइयो, हम कहति हउं कि मानउ अउर परमेसुर के राज क अधिकारी नाई हुइ सकल अउर न विनासी अविनासी क अधिकारी हुइ सकत हइ।⁵¹देखउ हम तुइते भेद की बात कहति हउं कि हम सबही तौ नाई सूतब मुला सब बदलि जइहई।⁵²अउर ई छन भर म, पलक झपकत पाछिल तुरही फूकतै होइ, काहे ते तुरही फूकी जाई अउर मुरदे अविनासी दसा म उड़ाए जइ हई। अउर हम बदल जइवै।⁵³काहे ते ई अवस्यइ हइ कि ई नासमान देह अविनास क पहिर लेइ अउर ई मरनहार अमरता क पहिन लेई।⁵⁴अउर जबै ई नासमान अविनास क पहिर लेइ अउर ई मरन हार अमरता क पहन लेई तब ऊ बचनु जउन लिखा हइ; पूर होइ जाई कि जय मिरतू क निगलि लिहिस।⁵⁵हे मिरतू तोहरी जय कहां रही? ⁵⁶हे मिरतू तोहरी डंक कहा रहा? मिरतू क डंक पापु हइ अउर पाप क बल बेवस्था हइ।⁵⁷परन्तु परमेसुर क धन्यवाद हइ, जउन हमरे परभु यीसु मसीह के जरिये हमका बिजयी करत हइ।

⁵⁸यहिते हे हमरे पियारे भाइयो, दिरिदु अउर अटल रहउ अउर परभु क काम म सरवदा करौ काहे ते ई जानति हउ कि तोहार परिसरम परभु म बेकार नाई।

दान केर विसय मा आग्या देय जात है

16 अब उइ दान के बारे म जउन पवित्र लोगन के खातिर किया जात है जैसी आग्या हम कलीसियन क दीन वैसेइ तुमौ करौ।²हफते के पहल दिन तुम मा ते हर एकु अपन आमदनी के मुताबिक कछु अपन पास छोड़ा करै, कि हमरे आवइ प चन्दा न करै क परै।³अउर जबै हम आइब तौ जिनाहिन क तुइ चहिहउ उनहुन क हम चिट्ठिन क दइकइ भेजि देइब, कि तोहार दानु यरुसलेम पहुंचाइ

देह।⁴अउर अगर हमारौ जाब उचित भवा तउ उइ हमरे साथइ जइहै।

पौलुस केर जातरा

⁵हम यकि दुनिया हुइ कइ तुम्हरे पासइ आइब काहे ते मोहिका यकि दुनिया हुइ कइ तौ जावे के हइ।⁶मुला सम्भव हइ कि तोहरे हियाँ ई ठहरि जाई अउर जाड़ा मां तोहरइ हिवा काटी, तब जेहि ओर हमार जाब होय, उइ ओर तुइ मोहिका पहुँचाई देव।⁷काहे ते हम अब मारग म तुइते भेंट नाई कीन चाहित, मुला मोहिका आस हइ कि अगर परभु चाहई तौ कछु समय तलक तोहरे साथ रहिहौं।⁸मुला हम पेंतिफुस तलक इफसुस म रहिहौं।⁹काहे ते हमार खातिर एकु बड़इ अउर उपयोगी दुआर खुलि हई। अउर बिरोधी बहुत हई।

¹⁰अगर तिमूथियुस आइ जांय तौ देखउ उइ तोहरे हिया निडर रहै। काहे ते उइ हमार नाई परभु केर काम करति हई।¹¹यहिते कउनउ उहिका तुच्छ न जानै, मुला उहिका कुसल ते ई ओर पहुँचाई देय कि हमरे पास आइ जाइ, काहे ते हम ऊ की राह ताकति रहउ हउं कि ऊ भाइन के साथ अबइ।

आखिरी सदेसु अउर अभिवादन

¹²अउर भाई अपुल्लोस ते हम बहुत विनती कीन हइ कि तोहरे पास भाइन साथ आइ जाय, मुला उइ

ई समय जाय कि कछुव इच्छा नाई कीन, मुला जबइ अवसर पइहई तबइ आइ जाई।¹³जागत रहौ, विसवासु म इसथिर रहौ, साहसी बनौ, बलवन्त होउ।¹⁴जउन कछु करति हउ परेम ते करौ।

¹⁵हे भाइयो, तुम इस्तिफनास क घराने क जानति हउ, कि उइ अख्या ते पहले क फल हई, अउर पाप लोगन की सेवा के खातिर तैयार रहति हइ।¹⁶यहिते हम तुमते विनती करति हउ कि अइसने अधीन रहा, बल्कि हर एकै क जउन ई कारन म परिसरमी अउर सहकरमी हई। अउर हम।¹⁷इस्तिफानास अउर फनतुनातुस अउर अखइकुस के आवइ ते खुसी हउं, काहे ते उनहुन तोहारि घटी पूरी किहिन हइ।¹⁸अउर उनहुन हमार अउर तोहार आतम क चैनु दिहिन हई यहिते ऐसन क मानउ।

¹⁹आसिया के कलीसियन की ओर ते तुइ का नमस्कार अक्विला अउर पिरिसीला का अउर उइके घर की कलीसिया कौ तुहे परभु म बहुत-बहुत नमस्कार।²⁰सबै भाइन के तुइका नमस्कार, पाक चुम्बन ते आपस म नमस्कार करउ।

²¹मोहि पौलुस क अपन हाथ क लिखा भवा नमस्कार, अगर कोई परभु ते परेम न राखै तौ वह सरापित हइ।

²²हमार परभु आवइ वाले हई।

²³परभु यीसु मसीह क अनुग्रह तुम पै होत रहइ।

²⁴मोर परेम यीसु म तुम सबते रहै। आमीन।